

Fin di welga di hamber sin niun meta cumpli



ORANJESTAD -- Prome minister Mike Eman a termina su welga di hamber ayera tardi. A pesar cu e no a logra haya un firma di gobernador Fredis Refunjol riba presupuesto 2014 of un revocacion di e KB cu Reino a pone riba gobernador pa no firma, e prome mandatario a bisa cu e riesgo cu el a tuma, tabata bale la pena.

Lesa e detayenan riba pagina A2

"Dialuna tin claridad"

Fin di welga di hamber di prome minister sin niun meta cumpli

ORANJESTAD

Prome minister Mike Eman a termina su welga di hamber ayera tardi. A pesar cu e no a logra haya un firma di gobernador Fredis Refunjol riba presupuesto 2014 of un revocacion di e KB cu Reino a pone riba gobernador pa no firma, e prome mandatario a declara cu a bale la pena pa core e riesgo cu el a tuma.

Ayera a cuminsa cu entre otro ministernan haciendo un yamada pa sigui donan yega Fort Zoutman y intensiva e protesta cu ya caba tabata drentando su di seis dia. Manifestantenan a bin cu weya pa bati y te hasta un a tira un klapchi. Polis a yega na e sitio y a pone ordo. Tabata den oranan di atardi, ora cu prome minister Eman a sali for di su tent banda di Fort Zoutman y a crusa caya pa drenta gabinete di gobernador. Poco rato despues, gabinete a emiti un comunicado di prensa den cual a anuncia cu no aki dos siman pero dialuna awo caba gobernador Fredis Refunjol lo ricibi e quickscan cu secretariado di College Financieel Toezicht (CFT) ta trahando riba presupuesto 2014. Manera conoci, for di diamars caba secretariado di CFT ta haciendo su investigacion, cu apoyo di Raad van Advies y Algemene Rekenkamer.

Dialuna awo

E comunicado di prensa ta duna di conoce cu gobernador Refunjol ta 'hopi preocupado pa e situacion di pais cu no por y no mag continua'. "Den interes di Aruba y su poblacion gobernador a empena su mes pa haci e proceso di investigacion mas cortico. Ta conoci cerca Gobernador cu e ministernan a para firme pa yega na un solucion. Pa es motibo aki un reporte preliminar lo ta cla riba dialuna 21 di juli y esaki lo ser entrega na gobernador. Basa riba e reporte preliminar gobernador di Aruba lo duna claridad riba e mesun dia tocante e firmamento di e presupuesto di pais Aruba pa aña 2014 segun e orden huridico vigente den Reino Hulandes", segun e comunicado. Esaki



basicamente kiermen cu dialuna gobernador Refunjol por dicidi tambe pa manda presupuesto pa Raad van State evalua y posiblemente manda Rijkswinsterraad pa destrui'e. Sinembargo, prome minister Eman a sali hunto cu gobernador Refunjol for di su gabinete, a dun'e un abraso fuerte ya declara cu gobernador a priminti'e cu "dialuna tin claridad". Na momento ey tambe, e prome mandatario a duna di conoce cu 'awe si e ta bay come algo', pues su welga di hamber a termina.

Ambiente di hubilo

Eman a gradici tur esunnan cu a para hunto cun'e, di esunnan cu a yuna hunto cun'e, Dios y su señora esposa, te na ministernan y parlamentarianan di AVP. Tambe el a tuma su tempo pa duna muestra di su malcontento cu na Hulanda a trancu nombramento di Mito Croes den Raad van State. Despues su auto a hib'e cas na unda e lo a wordo controla pa un dokter. Ambiente dilanti Fort Zoutman tabata uno di hubilo, pero tambe a cuminsa haci e hofi banda di entrada di fort limpi. Un di e prome cosnan pa bay tabata e mesa na unda hende por a firma e asina yama 'mocion di pueblo den cual ta urgi gobernador pa firma y gobierno di Hulanda pa kita e KB. Bon Dia Aruba no a haya oportunidad pa puntra cuanto firma a logra haya finalmente. Ayera a publica cu un cantidad di 8000

firma a wordo logra, pero for di fuientenan cerca por a compronde cu e cantidad berdadero no a yega 4000.

Preguntanan

Final di e welga di hamber di prome minister Eman ta laga un par di pregunta clave. Por ehempel, kico exactamente a conduci pa prome minister Eman termina su welga mientras cu basicamente el a sali for di gabinete di gobernador cu man bashi, sin niun garantia cu presupuesto lo wordo firma? Hecho tabata cu for di antayera negociacionnan riba nivel di ambtenaar a keda muestra di ta tranca. Ademas e tiroteo fatal na aeropuerto di Corsou a causa pa medionan internacional desvia nan atencion pa eynan. Prome minister riba dje a haci diferente entrevista caba cu medionan Hulandes. Kisas e avion di Malaysian Airlines cu a cay na Ukraina, matando 154 Hulandes a percura cu e accion na Fort Zoutman, cu localmente no tabata atrayendo mucho hende, lo no por haya atencion internacional mas y pesey lo a dicidi - considerando salud di prome minister tambe - pa termina e accion. Finalmente mester tuma den consideracion tambe hecho cu Grupo di Shete tin nan manifestacion contra gobierno awe y cu lo ta prudente pa evita un confrontacion. Kico lo bay pasa si gobernador dicidi dialuna awo pa no firma y manda presupuesto pa Hulanda toch, no ta conoci.

Reaccionnan

Mientras tanto politiconan tambe a duna nan reaccion riba fin repentino di e welga di hamber di prome minister di Aruba. Lider di fraccion di AVP, Rene Herdê, ta bisa Bon Dia Aruba cu prome minister Eman lo no a stop cu su welga di hamber si e palabracionnan cu a haci cu gobernador no ta un win-win pa Reino y pa Aruba. "Loke e win-win lo mester encera ta cu autonomia cu Hulanda a viola ta wordo para. Raad van Advies lo mester determina si tur loke Hulanda a haci tabata legal. Tin claridad ki dia e presupuesto cu Hulanda a pone Gobernador secuestra lo wordo firma. Hulanda a secuestra e presupuesto y den e periodo ey a forsa un investigacion como si fuera nos tin algo di sconde. Nos lo mester warda dialuna pa wak e detayenan." Riba pregunta kico Aruba a gana cu e welga di hamber, Herdê ta bisa cu por wak e di otro forma tambe. "Kico tur Reino a perde door di viola constitucion y statuut, viola derecho di presupuesto di parlamento di Aruba, reduci gobernador na un instrumento di poder Hulandes bruto y sin contenido real. Tur loke Hulanda a logra awor- informacion riba financia publico - nan por a haya sin tur e daño cu nan a causa na Aruba y na Reino. Den politica esey yama diplomacia, confiansa mutuo y respet pa ley." Lider di MEP Evelyn Wever-Croes di su banda tambe ta contento cu prome minister Eman a termina su welga di hamber. "Awor nos por bay atende cu e problemanan real di nos pais atrobe." Segun lider di MEP nada positivo a wordo gana. "Pero si nos crisis financiero a escala pasobra e 'uiststel' a pone e debenan bira mas haltu. e crisis constitucional a bira hopi mas serio y e relacion cu Hulanda ta totalmente destrui. Ademas e welga aki a sali hopi hopi malo pa Mike Eman y pa partido AVP. Finalmente Andin Bikker, lider di PDR, a tene su respuesta cortico: "Den mi concepto e accionnan di e siman aki no a yuda cu mucho. If anything, al contrario el a laga e relacionnan entre Aruba y Hulanda sigui deteriora." □